

## **PAULO ĜENA TORETORE FILIPI EKALESIARI ĜERI**

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia vari-varina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu “Iaku ema verere”, ema ĝena siri baregona tu karoa 4:4. Mai fefa nuĝanai “iaku” tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovtotova, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagaiaga.

Paulo na mai fefa tu maiĝesina eboioĝaiato:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

<sup>1</sup> Au Paulo ema Timoteo, Keriso Iesu ġena vetuġunaġi tauma, na ġomi Filipi ai Barau ġena tarimarima veaġari ma ġemi ekalesia guinea-iaġina tarimari ema vevaġa-kava tarimari ġesi atore-vinimini. Ġomi tu Keriso Iesu ġesi varau ġosebonato. <sup>2</sup> Barau ġita Tamara ema ġera Vereġauka Iesu Keriso ġerina varevare-bara ema maino ġemi ai bene tanu.

### *Paulo na Barau evaġa-namoato*

<sup>3</sup> Ġomi atuġamaġimini negari mabarari ai, ġegu Barau atanikiu-viniani. <sup>4</sup> Ġegu ġauġau ai vanaġivanaġi ġomi mabarami iatami ai aġuriġurini ma iakugu ġesi, <sup>5</sup> korana ġemi vevaġa-kava dabarari namori na ġovaġa-kavaguto Vari Namona varifiunai, Vari Namona ġoġabi-raġeato ġarona na beiaġoma mo initoma. <sup>6</sup> Ma ribagu maoro, Barau na mai ġauvei namona, nuġami ai evaġa-foforiato ġauveina tu, bevesiriġuni, beiaġoni mo, Keriso Iesu ġena ġenoġoi ġaronai vau bevaġa-kori ginikauani.

<sup>7</sup> Ġomi mabarami ġegu vemamiraġi na evaġa-moġoniani, ġomi tu au nuġagu ai roġo ġotanuni. Aba, dibura numai atanuni nuġanai, o Kota ġeseġaġini tarimari ġoirari ai Vari Namona aki-raġi-foforiani e gogobana aragani nuġanai maki, ġomi tu au nuġagu ai veġata. Korana ġomi mabarami maki Barau na ġena varevare-bara evinimito, au eviniguto kavana. <sup>8</sup> Barau ma ribana vedaurea, au ġomi akiramini, au ġegu veuravini ġomi mabarami ġemi ai tu barego vedaura, Keriso Iesu na euravini-baregomini kavana.

<sup>9</sup> Barau anogīani, ġemi ai veuravini bene tubu-barego vedaurea, ma riba ema iaunega bene vinimi, be Barau ġena ura boġono riba-ġinikaŭri. <sup>10</sup> Monana vauro boġo ribani, dagara namori tu aiġeri na ġemi tanu beġe vaġa-namorini rakava mabarari ġerina, benamo Iesu Keriso ma beġenoġoi-iaġomani ġaronai, ġomi tu asi vetoukaumi e asi ġemi kerere ta maki. <sup>11</sup> Ema veiġa namori e iobukaiobukari mabarari, Iesu Keriso ġenana ġeiaġomani dagarari, ġomi ġemi ai beġe tanuni, Barau vevato-iaġina e vaġa-raġena ġana.

*Paulo tu dibura numai etanuni, senaġi Vari Namona ebaregoni*

<sup>12</sup> Tarikakagu, ġegu ura boġono riba, au beġe diburagu o kara beġe ġora ġegu ai dagarari na Vari Namona ġena tubu tu asi beġe vaġa-rakavaia. Asiġina. Moġeri na tu Vari Namona ġena tubu beġe vaġa-baregoa. <sup>13</sup> Mai maġuri ġenana Kaisara, Roma ġeri vere, ġena numa ġeġita-ġauani tauri ema tarimarima mabarari maki beġe riba, au tu Iesu Keriso ġena vetuġunaġi aiaġo-vinini ġaramanai, dibura numai atanuni. <sup>14</sup> Ma ġegu tanu dibura numai ġenana maki au tarikakagu ġutuma ġeri veġabidadama Vereġauka ġenai beġe gwaġiġi naima, Barau ġena guruġa ma kokoreri ġesi ġeġobata-iaġiani.

<sup>15</sup> Moġoni, tarima kotari na ġegu ġauvei namo dainai, ġemama-viniguni. Ġeri ura tu au ġevaġa-rakavagu ġetoni, naima Keriso ġeġobata-iaġiani. Senaġi kotari na tu nuġa-namo ai ġeġobata-iaġiani. <sup>16</sup> Maiġeri tu veuravini ġenana

ġeġobatani, korana ribari, au diburai atanuni tu, Vari Namona gogobana bana raga ġana Kota tarimari ġoirari ai. <sup>17</sup> A tarima kotari na Keriso ġeġobata-iaġiani tu dia nuġa-namo ai, senaġi tauġeri arari beġene vaġa-raġeri ġana. Ġeri tuġamaġi tu, au dibura numanai roġo atanuni nuġanai, ġegu meto ġevaġa-baregoa ġetoni. <sup>18</sup> Bevaitovo, au ġegu iaku tu ebaregoni. Korana nuġa-namo ai Keriso ġeġobata-iaġiani ba asiġina, senaġi dagara baregona tu Keriso varina bene fiu-rovorovo dabara mabarari ai. Ma ġegu iaku maki bebarego-iaġoni moġo. <sup>19</sup> Korana ġemi ġauġau ai Barau ġonoġiani ema Iesu Keriso Iaukana na evaġa-kavaguni. Moġa lorinai au ribagu, au tu maġuri badoġariani. <sup>20</sup> Ġegu ura baregona ema dabaragu mabarana ġesi akirani, au tu asiġina ġinavaġi bana moira ġegu ġauvei nuġanai. Moġesi nai initoma dibura numai vanaġivanaġi akokoreni kavana bana kokore, be au taugu mabarana ġesi Iesu Keriso arana ma bana vaġa-raġea ġegu maġuri ġenana o ġegu mase ġenana.

<sup>21</sup> Be au ġegu ai maġuri tu kara? Iesu Keriso moġo! Moġa lorinai mase au ġegu ai tu dagara namona. <sup>22</sup> Betaġu bema roġo bamaġuri-taġoni nai, ribagu Keriso ġena ġauvei roġo haveiani, senaġi asi aribani, aiġa bara ġabia, mase ba maġuri? <sup>23</sup> Au tu dagara ruarua auravini-baregorini: Ġegu ura mai maġuri bara raga-kwaneana, be Keriso sev-inai bara tanu tu dagara namo vedaureana moġo; <sup>24</sup> senaġi namona tu ġomi bana vaġa-kavami ġana, be mai tauġani nuġanai roġo bana tanu. <sup>25</sup> Au tu

ribagu, au roĝo maĝuri batanuni. Ĝomi ĝesi roĝo bita tanuni, korana ĝemi veĝabidadama vaĝa-tuburi ema ĝemi iaku vaĝa-baregori ĝana. <sup>26</sup> Au ma baiaĝosini neganai, ĝomi tu boĝo iakuni au ĝegu ai, ema Keriso Iesu boĝo vaĝa-raĝeani.

### *Ĝemi tanu*

<sup>27</sup> Dagara sebona tu Keriso ĝena Vari Namona na ekiraĝiani ilailanai boĝono tanu. Baiaĝosini ĝitaĝitami ba manaĝa na moĝo varimi baseĝaĝini, baribani, ĝomi tu nuĝa-namo ai ĝoritoĝo-gigitarini ema nuĝa sebonai Vari Namona ĝoveseĝaĝi-vevini-iaĝiani ma kokoremi ĝesi. <sup>28</sup> Ĝebaruvinimini tarimari na asigina ĝinavaĝi beĝene vaĝa-garimi. Monana ĝeri ai vetoĝa beveiani, ĝia tu Barau na bevaĝa-rakava kwaikwairini, a ĝomi tu Barau na bevaĝa-maĝurimini. <sup>29</sup> Ĝomi tu dia Keriso ĝena varevare-bara e namo lorinai Keriso ĝovaĝa-moĝoniani tarimami ai ĝoiaĝoto moĝo, senaĝi ĝomi tu Keriso ĝena midigumidigu ai maki boĝono midigu ĝana ĝia aranai. <sup>30</sup> Ĝomi maki initiba au ĝesi bisini vetari-vegogo. Mai vetari tu vetari guinena ĝoĝitaiato-ĝoi vetarina ini roĝo ma ĝoseĝaĝiani vetarina roĝo avetari-iaĝiani.

## 2

### *Keriso ĝena vevaĝa-manau ema iaru-korokoro*

<sup>1</sup> Ĝemi maĝuri Keriso nuĝanai monana evaĝa-kokoremini ba? Ema ĝena veuravini na ĝemi tuĝamaĝi evaĝa-gwaĝiĝirini ba? Ĝomi na Iauka Veaĝa ĝatami ai ĝovaĝa-iaĝoato ma ĝotanu-vegogoni ba? Ma ĝemi vevetuĝaĝwa ema vevaĝa-kava ĝatami tata ĝeri ai ĝoveirini ba? <sup>2</sup> Moĝa

lorinai anogimini, boḡono vaḡa-iaku korikorigu, ḡemi tuḡamaḡi vegogo ai, veuravini sebonai ema nuḡami e iaukami maki sebonai boḡono tanu. <sup>3</sup> Dagara ta asi boḡono veia vevaḡa-raḡe tuḡamaḡina maḡurina ema veiavi maḡuriri ai, senaḡi ḡomi tauḡemi boḡono vevaḡa-variḡo tata fakami ai, a karomi boḡono ḡabi-ḡesitaḡori. <sup>4</sup> Karomi ḡeri namo maki boḡono vetau, a dia ḡomi tauḡemi ḡereḡami ḡemi namo moḡo.

<sup>5</sup> Ġemi veiḡai Keriso Iesu kavana boḡono vei, ḡena tuḡamaḡi boḡono ḡabia:

<sup>6</sup> Ġia tu dagara mabarari ai  
Barau ḡesi ilaila,

senaḡi asi etuḡamaḡito,  
mo maḡuri moḡa bene ḡabi-taria.

<sup>7</sup> Ġia tu tauḡena evekiraḡi-fitoḡato,  
benamo vetuḡunaḡi merona kavanai eiaḡoto.

Ġia maki tarimarima kavana eḡorato,  
benamo ḡita fakarai ema tanuto.

<sup>8</sup> Ġia tu eveḡwa-variḡoto ema Barau eseḡaḡi-  
viniato-ḡoi mo ḡena mase,  
aba, satauro ai emaseto noḡa moḡo vei-rakava  
tarimana ta kavana.

<sup>9</sup> Moḡa lorinai Barau na eḡabi-vaisiato guba  
tuḡunai,

ma ara namo vedaureana eviniato.  
Mo ara tu ara ta ḡesi asi ilaila.

<sup>10</sup> Iesu arana bakunai guba aneruri,  
e tanobarai ḡetanuni tarimari,  
ema tanobara gaburenai o mase gabunai  
ḡetanuni tarimari mabarari beḡene  
vetuitui-tari ḡia ḡoiranai.

11 Ema mea mabarari na Iesu Keriso beġene kiraġia “Vereġauka”,  
Barau ġita Tamara vevato-iaġina ġana.

*Bitana mama-rovorovo tanobara ġena mama*

12 Au ġatagu mabarami, vanaġivanāġi au ġoseġaġi-viniguto-ġoi ġera ġauvei vegogo ai kavana murigu ai maki boġono seġaġi-vinigu veġata. Boġono ġauvei ma garimi ema ma ġoġo-ġoġomi ġesi, maġuri boġono doġaria uranai.  
13 Korana Barau tu ġomi nuġami ai eġauveini, ġomi elaunaġimini e kokore evinimini, ġena ura boġono veiri ġana.

14 Ġauvei mabarari asi mugumugumi ema asi vanevanemi ġesi boġono ġauvei-iaġiri. 15 Be ġomi tu Barau natuna asi vetoukaumi ema namo vedaureami ai boġono iaġo, mai tanobara rakava kwaikwai ema ġevei-rakava-moġovaġini tarimari fakari ai; be boġono mama-rovorovo, noġa moġo visiġu boġi ai ġemamani kavana. 16 Mo tu bema maġuri guruġana boġo korana-iaġiani e boġo vari-fuani nai. Moġa boġo veiani nai, au tu ma ġegu maoro havekokorokuni ġomi ġemi ai Keriso ma beġenoġoi-iaġomani ġaronai. Korana mo ġaro ai au tu baribani, au ġegu vekwaraġi ema ġauvei ai tu asi avekwaraġi-kavato.

17 Bere au bara mase, ma rragu bere vebuburovorovo, noġa moġo ġomi ġemi veġabidadama varevarena Barau ġoviniani kavana. Irau moġesi nai, au tu aiakuni, ema ġegu verere maki ġomi ġesi tavei-sebonaiani. 18 Mai dabara sebonai ġomi maki boġono verere, be mabarara bitana verere-vegogo.

### *Timoteo batuḡu-iaḡosiani*

19 Bema Iesu Vereḡauka ḡena ura nai tu, atuḡamaḡini, Timoteo tu batuḡu-iaḡosiani; be ḡomi varimi banama seḡaḡia nai, au nuḡagu benema gena-tari. 20 Timoteo ḡereḡana na moḡo au ḡegu vemamiraḡi eribaiani, ema ḡomi ḡobimi vetuḡamaḡina evei-baregoni. 21 Tarimarima mabarari tu tauḡeri ḡeri maḡuri moḡo loriri ḡetorerini, a Iesu Keriso ḡena ḡauvei tu asi ḡevetauani. 22 Ġomi tu ribami ginikau, ḡia vetoḡana ema ḡena vetuḡamaḡikau, kamasi ḡia e au, noḡa tama ma natuna ḡeḡauvei-vegogoni kavana, Vari Namona ḡaḡobata-iaḡiani. 23 Moḡa lorinai bana tuḡu-iaḡosi-ḡarimoḡia, maḡuri mainai kamasi bevetoreni ḡegu ai bana riba vau. 24 A ḡegu vetuḡamaḡikau Vereḡauka ḡenai atoreani, au maki vau mani ma baiaḡosini ḡemi ai.

### *Epafrodito ḡena iaḡosi*

25 Ġegu tuḡamaḡi ai akirani, namona tu tarikakara Epafrodito ma bana tuḡu-ḡenoḡoi-iaḡosia. Ġia maki au ḡesi ḡaḡauveito e Keriso ḡena vetari ai ḡavetari-vegogoto tauna. Ġomi maki vetuḡunaḡimi eveito, au ḡegu ai ḡotuḡuato nai, ḡemi varevare dagarari na bene vaḡa-kavagu ḡana. 26 Ġia maki eura-baregoni ḡomi bene ḡitami. Ema enuḡa-vekwarāḡini ḡemi ai, korana ḡena keve varina ḡoseḡaḡiato nai. 27 Moḡoni veḡata, ḡia tu ekeve-rakavato, dori emaseto, senaḡi Barau ḡena vevetuḡaḡwa ḡia iatanai, ema dia ḡia iatanai moḡo, senaḡi au iatagu ai maki, korana ḡegu nuḡa-meto bebaregoni garina. 28 Moḡa lorinai ḡegu ura baregona bana ragatuḡu-iaḡosia ḡemi ai,



be boḡono ḡitaia ma boḡono iaku, benamo au ḡegu nuḡa-vekwarāḡi bene meraḡa kekei. <sup>29</sup> Boḡono ḡabi-raḡea ma iakumi ḡesi ḡera Vereḡauka aranai, ema ḡemi vegubakau marevana bene fofori tarima maiḡesiri ḡeri ai. <sup>30</sup> Korana ḡena maḡuri ḡaramana asi eveito, ema dori emaseto, korana Keriso Varina Namona ḡaramanai. Vetoḡa maiḡesina ḡegu vevaḡa-kava ḡomi na ḡoro vinigu kavana tu ḡia na au ema vaḡa-kavaguto.

### 3

*Keriso evaḡa-moḡoniani tauna tu vei-iobukaiobuka tarimana*

<sup>1</sup> Tarikakagu mabarami, ḡegu guruḡa magona nuḡanai maiḡesi nakira: Boḡono iaku, korana Vereḡauka ḡesi ḡokaro-vekafani nai. Asi bagauni, guruḡa guineri batuḡu-ḡenoḡoi ḡenoḡoini, korana ḡomi ḡobimi toretoreri ḡana.

<sup>2</sup> Lorimi boḡono vetore ekalesia vaḡa-rakavana tauri gariri. Ḗia tu kwaiva rakavari kavana, ḡeri tuḡamaḡi tu ḡita mabarara tauḡanira kefiri bitana lama-vaḡiri ḡetoni, Isaraela besena ḡeveini kavana. <sup>3</sup> Senaḡi tauḡani kefiri lamavaḡi veiḡana korikorina tu ḡita na taḡabiato, a ḡia tu asiḡi: Ḗita tu Iauka Veaḡa ḡena seḡukai Barau tatutuḡu-tari viniani, ema Keriso Iesu ḡenai tavetuḡa-maḡikauni, ema ḡera veḡabidadama tu dia tauḡani ai vetoḡa ḡeveini moḡeri ai tatoreani.

<sup>4</sup> Bere tauḡani ḡena vetoḡa ema ḡera veiḡa dagara baregori nai, ḡegu veḡabidadama tu tauḡani ḡena vetoḡa dagarari ema ḡegu veiḡa ḡeri ai bara torea riba. Bema ta ḡena veḡabidadama

tauḡanina ḡena vetoḡa dagarari ema ḡena veiḡa ḡeri ai bene torea etoni nai, au tu ma ḡegu maoro moḡeri dagarai bara veḡabidadama. <sup>5</sup> Amaḡurito, ḡaro vaḡa-imaima toitoinei (8) tauḡanigu kefina ḡelama-vaḡiato. Au tu Isaraela tarimagu, Beniamina ḡena doḡoro tarimagu, Heberu rarari tarimagu korikori. Iuda tarimari ḡeri taravatu akorana-iaḡi ginikauato-ḡoi, korana au tu Farisea tarimagu. <sup>6</sup> Barau ḡena taravatu bana korana-iaḡi ginikaua ḡaramanai tu, ekalesia doḡorona avaḡa-midigu midigurito. Ema Iuda ḡeri taravatu mabarabarari akorana-iaḡi ginikau ginikaurito-ḡoi, asi ḡegu vei-rakava ta.

<sup>7</sup> Moḡeri dagara mabarari guinenai tu atuḡamaḡi-baregorito-ḡoi; senaḡi initoma Keriso ama ribaiato nai, mo dagara guineri mabarari aḡitarini tu asi ḡeri namo ta maki. <sup>8</sup> Moḡoni veḡata, dagara mabarari tu asi tauri dagarari, senaḡi dagara baregona sebona moḡo tu Keriso Iesu, ḡegu Vereḡauka, bana riba-ginikaua. Oba, dagara mabarari momo ai ḡeiaḡoto au ḡegu ai, Keriso moḡo bana ḡabi-gigitaria ḡana uranai. <sup>9</sup> Ḣegu ura ḡia ḡesi bana sebona-korikori, korana ribagu, taravatu ekorana-iaḡi gini-kauani tarimana Barau ḡoiranai ḡia tu dia vei-iobukaiobuka tarimana, senaḡi Keriso evaḡa-moḡoniani tarimana moḡo; korana Barau na vei-iobukaiobuka tarimarai bekiraḡirani dabarana sebona tu veḡabidadama ḡenana moḡo. <sup>10</sup> Ḣegu ura baregona tu Keriso bana riba-ginikaua, ema mase na evaḡa-vaisi-raḡeato seḡukana bana ḡabia; ema emidiguto midiguna maki bana

mami-tovoa, ma ġia ġena mase kavanai au maki bana mase. <sup>11</sup> Mainana vau atuġamaġini, au maki mase na bavaisiraġe-ġenoġoini.

<sup>12</sup> Au asi akirani, moġeri mabarari varau aġabirito, o varau anamo-vedaureato, asiġina. Senaġi au tu avekwarāġi-rakavani, auna bana ġabia ġana, korana Keriso Iesu ġena kwalimu ai au maki eġabiguto ġia ġena. <sup>13</sup> Moġoni, tarikakagu, asi akirani varau akwalimuto atoni, asiġina. Dagara sebona moġo tu, maġuri guineri atuġarekwarito, ma ġoiragu dagarana bana ġoitaġoa kokorena moġo avetauani. <sup>14</sup> Initoma tu araga-maoromaoroni, kiraġitore makana aiaġo-viniani, mo kwalimu voina bana ġabia uranai, dagarana tu Barau ġena maġuri gubai. Korana Barau na Keriso Iesu ġenana ekeaguto, mo maġuri bana ġabia ġana.

<sup>15</sup> Ġita ġera veġabidadamai taruġa-gwaġiġito taura tu maiġesi bisini tuġamaġi-vegogo. A ġomi betaġu dagara tari ai ġemi tuġamaġi tu irau nai, Barau na vau tuġamaġi-faka bene vinimi. <sup>16</sup> Dagara sebona, iauka maġuriri namori ġita na varau taġabirito moġeri bitana ġabi-gigitariri.

<sup>17</sup> Tarikakagu mabarami, au boġono tovo-tovogu. Veġa namo ġeveini tarimari boġono marereri e boġono tovo-tovori maki, vevaġa-ġita namori avaġa-ġitamini kavana. <sup>18</sup> Korana varau avaġa-guruġa ġenoġoi-ġenoġoimito-ġoi, senaġi ini tu ma avaġa-guruġamini ma taġigu ġesi: Ġutuma ġekirani, Keriso murinai ġerakani ġetoni, senaġi ġeġofaġofani, Iesu Keriso ġena satauro ġevetari-viniani. <sup>19</sup> Ġia varau rakava gabuna ġana ġeiaġoni,

korana ġeri barau tu ġia tauġaniri na ġeikua-iaġirini dagarari. Ġeri veiġa rakavari, ġere maiaka-iaġiri veiġari, ġeveiavi-iaġirini. Ema mai tanobara dagarari moġo ġetuġamaġi-gigitaririni. <sup>20</sup> A ġita tu Guba Basileia tarimara. Moġa lorinai ġera vevaġa-maġuri tauna, ġera Vereġauka Iesu Keriso ma iakura ġesi tanariani, guba tuġuna na beiaġomani. <sup>21</sup> Ġia na ġita mai tauġanira moiramoirari maiġeri bekurevorini, benamo ġia tauġanina namo vedaureana kavanai beġe iaġoni. Korana ġia seġukana na dagara mabarari ġia ġena veġitaġau gaburenai beġe tanuni.

## 4

### *Sisiba guruġari tari*

<sup>1</sup> Tauna moġa, tarikakagu, Vereġauka ġena maġuri nuġanai boġono ruġa-gwaġiġi. Au na auravini-baregomini ema bana ġitami veġata atoni, korana ġomi tu au ġegu verere korana e ġegu kwalimu vetoġana.

<sup>2</sup> Euodia ema Sintike, anoġimini, nuġami beġene sebona, korana ġomi tu Vereġauka ġena doġoro vavinemi. <sup>3</sup> Ġoi maki, Sisigo, au karogu namona, anoġimuni, mani vavine kika bono vaġa-kavari, ġia maki au ġesi ġaġauvei-vegogoto-ġoi Vari Namona fiufiunai, e Klement ema ġita karora tari maki. Ġia arari tu Barau ġena maġuri vanaġivanāġi bukanai varau etorerito.

<sup>4</sup> Vereġauka ġena maġuri nuġanai ġaro mabarari ai boġono iaku. Ma nakira: Boġono iaku. <sup>5</sup> Ġemi manau e nuġa-marana boġono vevaġa-ġita-iaġiri tarimarima ġeri ai. Korana

Vereġauka ġena iaġoma bekavinaġi-rakava. <sup>6</sup> Dagara ta tuġamaġi-vekwaraġina asi boġono vei, senaġi vanaġivanaġi ġemi rabu dagarari ġauġau ai Barau boġono noġia ma tanikiumi ġesi. <sup>7</sup> Benamo Barau na ġena maino, ġita mabarara ġera riba e tuġamaġi-faka evanaġiato mainona, bevinimini, ma mo maino na ġomi lorumi ema ġemi tuġamaġi mabarari benari-ginikaurini, Keriso Iesu ġena maġuri nuġanai ġotanuni dainai.

<sup>8</sup> Tarikakagu mabarami, ġegu toretore magona rekenai nakira, vanaġivanaġi veiġa maiġesi kavari boġono tuġamaġi-iaġiri: Maġuri moġoniri, dagara marevana irau veġata, vei-iobukaiobuka, veiġa namo vedaureari, veuravini veiġari, ema vegubakau maġuriri. Dagara namori ema tarimarima na ġevaġa-raġerini veiġari mabarari boġono tuġamaġi-iaġiri. <sup>9</sup> Ġegu ġobata na ġoribarito guruġari ema ġegu veiġa na ġodoġaririto veiġari mabarari ġemi maġuri ai boġono ġauvei-iaġiri e boġono korana-iaġiri. Benamo maino evinirani Barauna ġomi ġemi ai bene tanu.

### *Filipi tarimari ġeri vevaġa-kava*

<sup>10</sup> Ġegu iaku tu asikei ema Vereġauka avaġa-namoani nuġagu mabarana ġesi, korana ġemi vevaġa-kava varevarena ma boġo tuġu-iaġomaia nai. Au ribagu, asi ġotuġarekwaguni, ġemi ura vanaġivanaġi boġono vaġa-kavagu, senaġi gabu manaġai atanuni nai, asi ġemi dabara ta au vaġa-kavagu. <sup>11</sup> Au tu dia dagara tai akubini naima maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila. <sup>12</sup> Au

tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maġeri maġuri baraga-ġoitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubu-maseguni o bevitoguni, ġegu-ġagu vovoka o bakubini au ġegu ai tu ilaila moġo. <sup>13</sup> Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

<sup>14</sup> Senaġi aiakuni, korana ġemi vevaġa-kava barego mai ġegu meto nuġanai bama doġaria. <sup>15</sup> Ġomi Filipi tarimami tu ribami: Makedonia aiġuiato, tovotovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami. <sup>16</sup> Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai. <sup>17</sup> Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaia.

<sup>18</sup> Au ġegu ai ġomi ġemi varevare dagarari ġotuġu-iaġomarito tu mabarari maġeri, be ġegu-ġagu tu vovoka ema ilaila. Ribagu, aura-vinirini dagarari mabarari maġeri Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini gini-taġo varevareri, Barau ġevaġa-iakuani dagarari. <sup>19</sup> Ġegu Barau na ġena farefare namori ema vovoka tabutaburi Keriso Iesu ġenana bevarevare-

vini ginikaumini ġemi rabu ġarori ai. <sup>20</sup> Tamara Barau bitana vaġa-raġea vanaġivanaġi, Amen.

*Vevaġa-namo guruġari*

<sup>21</sup> Iesu Keriso ġena tarimarima mabarari ġeri vevaġa-namo ġeguna eiāġosini. Ġita tarikakara au ġesi ġatanuni na ġemi vevaġa-namo beġe tuġu.

<sup>22</sup> Barau ġena veaġa tarimari mabarari ġerina vevaġa-namo beġe tuġu ġemi, ema Kaisara, Roma ġeri vere, ġena numa tarimari na maki ġemi vevaġa-namo bareġona beġe tuġua.

<sup>23</sup> Vereġauka Iesu Keriso ġena namo ema varevare-bara ġomi tata iatami ai bene tanu.

**GINITAŌ VARIŪUNA**  
**The New Testament in the Sinaugoro Language of**  
**Papua New Guinea**  
**Nupela Testamen long tokples Sinaugoro long Niugini**  
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 11 Nov 2022 from source files dated 22 Nov 2019  
a998e4ce-f2f7-5577-968e-5d2feef358f1